

Penganggur tumbuk anak sendiri didenda RM2,000

SIBU: Seorang penganggur yang didakwa mencederakan anak perempuannya dengan menumbuk pipi kiri mangsa, dijatuhi hukuman denda maksimum RM2,000 atau penjara sebulan oleh Mahkamah Majistret Sibu, semalam.

Mohamad Musa Saraee, 44, dijatuhi hukuman itu setelah mengaku bersalah terhadap pertuduhan yang dbacakan di hadapan Majistret Oon Kork Chern.

Mengikut pertuduhan, Musa didakwa dengan sengaja mendatangkan kecederaan kepada anak perempuannya yang berumur 22 tahun, dengan menumbuk pipi kiri mangsa di sebuah rumah di Kampung Bahagia Jaya pada 27 Ogos 2026, jam lebih kurang

4.40 petang.

Sehubungan itu, tertuduh telah melakukan kesalahan yang dihukum di bawah Seksyen 323 Kanun Keseksaan, yang memperuntukkan hukuman penjara sehingga satu tahun atau denda tidak melebihi RM2,000 atau kedua-duanya sekali jika sabit kesalahan.

Berdasarkan fakta kes, semasa pengadu yang juga anak tertuduh pulang untuk mengambil barang miliknya dari rumah neneknya di Kampung Bahagia Jaya, tertuduh telah bertanya perihal tempat pengadu menyewa rumah.

Namun pengadu tidak mahu memberitahu menyebabkan tertuduh marah lalu menumbuk bahagian pipi kirinya.

Akibat kejadian itu, pipi kiri pengadu bengkak sebelum pengadu membuat laporan polis bagi tindakan lanjut.

Pada 27 Ogos 2026, jam lebih kurang 11.30 malam, pihak polis telah menahan tertuduh di rumah mereka di Kampung Bahagia Jaya bagi membantu siasatan.

Dalam pada itu, Musa turut dikenakan hukuman denda RM2,600 atau lima bulan penjara oleh mahkamah atas kesalahan menyalahgunakan dadah Amphetamine dan Methamphetamine.

Selain itu, mahkamah turut memerintahkan tertuduh berada di bawah pengawasan pihak berkuasa selama dua tahun.

Tertuduh didakwa menyalah-

gunakan dadah Amphetamine dan Methamphetamine ketika ditahan di Balai Polis Sungai Merah pada 1 Mac 2023, jam lebih kurang 3 petang.

Sehubungan itu, tertuduh didakwa melakukan kesalahan di bawah Seksyen 15(1)(a) Akta Dadah Berbahaya 1952 dan dihukum di bawah Seksyen 15(1) akta yang sama.

Pendakwa kes dikendalikan oleh Timbalan Pendakwa Raya Keshava Rao Tharma Raja dan Pegawai Pendakwa Inspektor Ting Yew Kang.

Tertuduh yang tidak diwakili peguam, bagaimanapun gagal membayar kesemua denda dan diperintah menjalani kedua-dua tempoh hukuman penjara tersebut secara berturutan.